

瓊山縣志卷之四

建置志一

城池

附公署

瓊山縣治附郭其城卽海南衛城也漢置珠崖郡

於東潭都城址尙存又於顏村側置顏盧縣城

又因顏盧爲珠盧縣唐以其地置崖州附縣曰

顏城貞觀元年改爲舍城五年以崖之瓊山置

瓊州於白石都乾封間沒於崙獠貞元間討復

之宋開寶五年始徙今治卽漢璚瑁地築城凡

三里紹興間許益亂管帥李諤復因舊十城而

增築爲外羅城元因宋舊

阮通志按方輿紀要瓊州府卽古崖州城

城邑考今府城唐貞觀五年創置宋元因之

明洪武亡西指揮孫安建

議請展庚戌指揮張榮自城西北至東南隅加
廣之計周圍六百丈高二丈五尺闢東西南三
門東曰朝陽南曰靖南西曰順化各建敵樓城
北無門建樓曰望海南築長隄引溪爲濠自東
城下達抱崙村甲寅復奏請增廣自城北循東
至南長三百四十四丈高濶如舊改東門曰永
泰四隅增建角樓戊午指揮蔡玉復請加廣北
面自西至東四百餘丈通計周圍一千二百五
十三丈高二丈七尺廣一丈八尺今郡志作雉
二丈八尺
堞一千八百三十三十今郡志
作四十三窩舖共三十七
今郡志作濠塹周一千二百八十七丈深三丈
五十七

二尺濶四丈八尺

康熙二十二年肇慶府丞李彥珩奉上憲丈勘數目不符

此依新又改正

宏武甲子指揮桑昭於西城外增築土

城三百八丈西南北亦闢三門上各建敵樓謂

之子城成化癸巳副使涂棐改題各門東曰體

仁西曰歸義南曰定海丁酉僉事陳昭復堅築

土城又於大城環增欄馬牆嘉靖戊午知府李

慎易子城以石旋圯乙丑參議曹天佑委縣令

曾仕隆重築鄉紳參政鄭廷鵠助夫運石增砌

圍三百十二丈高一丈四尺有奇比舊堞闊一

丈二尺上殺三之一雉堞六百四十有二

今郡志作

五百三十二門仍舊制崇正辛巳知府蔣一鴻創建

東門外月城周圍寬八丈高一丈四尺比舊堞
闊八尺雉堞四十有二關門一南向南門外月城
周四丈高濶如之雉堞三十順治乙未學道林
嗣環知府朱之光推官何澄知縣孟信各捐修
增高雉堞一尺厚五寸旋壞康熙六年丁未分
巡學道馬逢皋知府張恩斌知縣王好仁重修
委縣丞施之蔭督竣庚戌風雨損壞辛亥知府
牛天宿知縣金光房再修十一年壬子閏七月
颶風大作隳南門大樓東北角樓及窩舖十二
間圯南城一十二丈東城三丈餘全城雉堞毀
十之五六巡學道王廷伊知府牛天宿同知劉

永清知縣劉源清共捐修二十四年颶風傾倒
城垣六十餘丈雉堞一百二十并各門城樓子
城傾倒三樓城垣五十五丈副使程憲郡守佟
湘年與總鎮劉成龍文武捐俸分修程公修西
北及城樓總鎮劉暨二營修東南佟公修外城
及大城南樓二十六年海防潘廷侯改東門外
月城門仍照大城東向三十一年郡守張萬言
以各城樓爲颶風圯毀捐俸重建南樓三十三
年重修東樓四十七年分巡雷瓊道焦映漢以
郡城修厯多年雨風摧敗樓堞傾圯詳請兩院
設處重修雍正七年颶風損壞府城垛口乾隆

三年署縣事崖州知州張琯詳請動項修復四年六年疊遭颶風郡城周圍城樓窩舖垛口損壞崩塌無數八年知縣楊宗秉修復四大城樓共一十二間窩舖十間東南隅城垣二丈四尺五寸垛口三十九個又修復子城門樓三座垛口四十個共捐墊銀三百九十餘兩造冊請項撥抵三十七年知府蕭應植率屬修葺嘉慶十年知縣鄭榕捐修二十三年知縣李景沆同闔屬州縣捐修道光二十年知縣金樹本捐廉重修二十九年劉斯增修其周圍雉堞原係碎石甃成不時毀壞咸豐五年巡道黃鍾音重修換

以版築其泥則用灰沙和之并造城門上敵樓
三紳士李芳徽王子俊督理子城南北二敵樓
久圯道光二十一年知縣金樹本修復咸豐五
年知縣李文烜重修俱紳士王廷傳督理

舊志增

海口所城在郡城北十里明洪武甲戌都指揮花
茂奏築防倭乙亥安陸侯吳傑委千戶崇實興
築周圍五百五十五丈高一丈七尺闊一丈五
尺雉堞六百五十有三窩舖十九闢四門各建
敵樓東北臨海共砌石岸九十丈復自東南延
西北浚濠長四百六十五丈闊一丈五尺深五
尺明永樂戊戌指揮牛銘復增石砌成化十三

年僉事陳昭增築欄馬牆康熙六年丁未分巡
學道馬逢皋知府張恩斌知縣王好仁加修復
壞辛亥分巡學道王廷伊知府牛天宿同知劉
永清再修十一年壬子七月值颶風崩城五十
三丈雉堞毀者三之一三門城樓俱傾分巡學
道王廷伊知府牛天宿同知劉永清知縣劉源
清復修之廿四年颶風傾倒城垣二百二十九
丈二十九郡志作三十九雉堞一百八十六并城樓四座
防廳王元臣瓊山縣朱玘同水師協鎮李尙翠捐
俸分修四十七年巡道焦映漢以海口城樓雉
堞頽圯比郡城爲尤甚詳請兩院重修焦公有重修郡

城海口城記見藝文雍正七年颶風損壞海口城垣雉堞

各州縣合力捐修乾隆四年六年疊遭颶風毀壞十一年知縣楊宗秉會同營員細估工資詳報未經奉准乃先捐銀修復城樓四座三十七年知府蕭應植率屬補修五十六年咨准部覆動項修葺嘉慶十三年知縣言尙燁捐修道光八年知縣蘇槃補葺上全

萬壽宮在城內西南隅乾隆四年副使劉庶總兵武進陞瓊州知府李毓元瓊山縣知縣杜兆觀捐建中爲

正殿八角龍亭一座內朝門一座三間外東西朝房十

間午門一座三間外東西官廳二間乾隆十一年巡道謝懋總兵黃有才署瓊州府知府于需瓊山縣知縣楊宗秉協捐增建內朝房十間午門外照牆內戲臺一座

先是地原係廢毀天主堂雍正八年總兵官李

順奏請爲武義學乾隆三年奉文裁革○舊志

公署

提督學院行署在城內東南隅瓊郡隔越重洋向無分司公署亦無差使行臺康熙二十五年副使程憲郡守佟湘年始於南門直街建鄉約亭朔望聚民講約康熙三十三年太守張萬言將約亭爲考院事竣仍聚民講約西向雍正十年

太守宗公思聖率闔屬紳士捐金改建府署之
左南向乾隆十年知縣楊宗秉備造八尺長試
棹五百張八尺長版凳五百條列入交代以垂
永久乾隆三十五年以府署之左改建府學宮
而以城東南隅府學舊址改爲試院卽今督學
行署道光六年闔郡紳士醵金購石改砌東西
雷文場坐號前東西場太空濶屢爲颶風飄毀道
光二十一年知縣金樹本仝紳士議改東西場
各爲兩層

舊志增

按明初至中業學使按臨雷州檄瓊士北渡
赴試萬曆七年准郡人尙書王宏誨疏以海

南道兼提學事 國初仍之康熙十五年始

以廣東提學道巡試雍正九年分設提學二

瓊隸肇高督學考校乾隆十六年督學復歸

於一惟渡海維艱故歲科兩考一時舉行通志

雷瓊兵備道署在府治之右元立海北海南道分

司於今府署元末改爲元帥府明洪武二年改

爲州署三年陞州爲府移府署於東以州署仍

爲海南道署成化二十三年太守張英復移道

署於東而以舊署還府 國朝因舊址頽圯改

明參將府爲分巡提學道署卽今公署康熙十

一年分巡學道馬逢皋王廷伊重修十六年知

縣茹鉉捐置官廳以爲屬吏候謁之所乾隆十
四年巡道黃鍾重修大門儀門六房添建花廳
立牌樓二十二年巡道張介祺重修二堂并補
葺署中廨舍三十五年大風牌樓傾圯巡道王
錦重修嘉慶二十二年護道史祐瓊山縣知縣
李景沆修建內寢及頭門客廳道光十一年護
道金蘭原重修咸豐五年巡道黃鍾音重新大
堂

舊志
增

雷瓊道庫大使署舊以府倉大使兼理後府倉歸
併首縣倉大使裁專設庫大使署歲久坍塌乾
隆三十一年署知府李璜詳建署於城內靖南

街郡志

瓊州府署在道署左卽元海北海南道分司署址
唐析崖州地置瓊州宋改爲安撫司元以爲元
帥府而遷安撫司於東明洪武三年移建府治
於安撫司之舊址成化二十三年太守張英始
遷於此卽今公署宏治六年太守張繼宣於堂
東置經歷司西置照磨所廣盈儀從二庫在廳
事左右架閣在照磨所西堂下東西始立六房
同知判推列於儀門外左右其正衙後左置樓
樓後置吏舍正德六年太守王子成添建官舍
於照磨所後十年通判李正祥拓地增吏舍於

右曠地嘉靖四十五年府堂傾圯隆慶二年知

府史朝宜重建爲正堂五楹後堂如之堂後有

樓堂右爲清軍廳左爲燕思堂左前爲經歷司

右爲照磨所及廣盈架閣二庫堂上左右兩序

列吏舍甬道立戒石銘外爲儀門左爲土地祠

即靈

官堂右爲虛受堂

即迎賓館

督糧理刑二廳在儀門外

左右大門外爲榜房萬曆二十九年添設撫黎

廳於署左

後裁革

萬曆以前督捕理刑俱從大門

出督捕自謝秉選理刑自張材各另建署門出

入始更前制國朝裁撫黎通判歸併海防同

知以判署爲同知公署理刑經裁公署猶在照

磨所久經裁革移經歷司署於照磨所其舊經歷署圯廢爲曠地康熙十一年大風瓊州後衙川堂及儀門全隳大堂及六房半傾知府牛天宿次第修建海防公署同時傾圯同知劉永清重修自康熙十一年修後屢遭颶風大堂五楹多被損壞至康熙四十六年州縣設處重修雍正三年知府岳綸修葺大堂乾隆二十一年署將傾圯知府左興率屬捐修道光八年知府曹祥捐修二三堂及庫房吏舍十一年署知府王玉璋修葺十四年知府富爾崇阿捐修

舊志增

海防撫黎同知署在海口所城內其舊署原在府